

明

史

明史卷三百八十九

循吏傳

循吏上

有國家者必首重吏治吏治弗清即民事胡由而理
明祖懲元末積弛之弊銳意振剔故馭吏特嚴設峻
法以繩貪懸高爵以獎異海內嚮風舊習丕變列辟
相承三考六計並留神激勵之典令甲增修廉隅交
厲而濯磨自見者未嘗不聞達於九閭之任優陞行
之不俸無戒於前代賜金增秩之錄舉故成私之間
吏淳民樂饒有漢宣之風蓋亦其積累而然者也神
廟之初純事綜核周亦時宰救敗之宜而為之已甚

則頗傷嚴急嚴急之過轉而墮弛消長相乘勢所必
爾浸焉淫焉官方刈斲職業曠捐求其牧我蒸民殫
心節屋者寧幾人耶啓禎之季變故煩興吏道多雜
民生日蹙以至誅求水火災害交并虐我則仇成疾
視其長工而莫救矣嗟乎吏治攸閑如此是惡可不
重加之意乎

陳灌字子將廬陵人幼孤事母孝見元季政衰棄書
學兵法環所居築塲樹木人莫測其意數年樹森鬱
成列遠近盜大起募壯士結屯其中一鄉賴以全陳
友諒據江西其將熊天瑞招致灌與俱至九江知友

諒不足事去之明太祖克武昌灌因羅獲仁詣軍門
上謁歷陳定亂安民策太祖善之即用為湖廣行省
員外郎累遷大都督府經歷從徐達北征既下泰州
留灌繕城功竣除寧國知府是時民遭變久不知禮
義灌至建學擇師選子弟教之問民疾苦禁蕪并畝
欺隱所創戶帖帝取為式布天下宣城田瀕江者歲
苦水患為伐石築堤作水門時蓄洩遂為永利屬邑
秋糧率不入官廩虛藉其數以上灌察知賜言將以
某月日覆按民間爭灌輸公帑皆滿及期間實不刑
一人有盜麥舟坐死者四十八人灌曰此愚民因舟

飄抵圻延取之非行劫也坐為首者一人餘悉減死
淮風采凝峻特守嶠然為治則尚寬大故人皆愛悅
之洪武四年謁告歸省召至京病卒其後有袁旭者
字廷輔江西樂安人由進士為江津知縣有異政正
統元年用大臣公舉擢寧國知府旭善撫綏深得民
心學校公署橋梁道塗無廢不舉而民不知勞十年
華治行卓異賜織金衣寶鈔宴於禮部仍還任其年
六月督學御史程富劾旭教飲民財妄興工作且秋
庭無事宜按問帝怒下巡按御史覆核未報旭亦許
富挾私及其不法事章并下法司俱宜褫奪命編旭

保安州為民雷翰贖還職旭先已連繫竟死於獄已而剋按御史王震言旭杖斃平民無實狀會旭已死不問旭雖被訐而死然宣州人語賢守者必曰袁公為建祠奉祀

方克勤字去矜浙江寧海人幼有神童稱篤志洛閩之學窮探力索寢食為廢元末海寇起行省命吳江同知金剛奴募民為水軍克勤上謁曰民窮為盜即未為盜者亦蠢蠢欲動奈何授之以兵是謂增盜非禦盜也金剛奴怒不荅既而水軍果中道叛殺領護者散而從盜金剛奴踰垣走折一足始悔不用克勤

言未幾都事劉基從侍御史至台州招撫克勤上書
陳勦珍之策不宜姑息基雖善其言亦不能用也洪
武二年浙東既入版圖詔郡縣立學有司辟為訓導
勤於啟迪來學者日衆尋以母老謝歸四年太祖聞
其賢徵之詣政府固辭執政不許命就吏部試名列
第二特授濟寧知府錫之冠帶既至專務以德化民
民有不便令詣府自言日引耆老與坐訊問得失大
興學校親為講課屬縣悉立社學凡數百區兵燹之
後儒教復興弟子繁籍者二千人惠役法不均與民
約列丁產為上中下三等等役析為三有徵發視差

等吏不得緣為奸郡城壞當役軍繕修指揮私其軍
方要月役民萬餘治之民不得田哀號城下克勤奮
曰民用不救焉用二千石為哉密聞之中書省即日
詔罷役先是久不雨克勤袒跣過禱神祠夜則涕泗
卧祠下誓不雨不還及是詔下雨隨注民歌曰孰罷
我役使君之力孰成我黍使君之雨使君勿去我民
父母五年秋隣境蝗克勤省愆減食藉首籲天迨夜
聞空中有聲燭之乃蝗飛蔽天去郡獨有年永嘉侯
朱亮祖督舟師數百艘北征至濟寧水涸不可動令
役夫五千浚河督以軍法克勤不忍煩民泣禱於天

夜即大雨水深數尺舟竟去克勤為政以風化為急
不喜近名常曰近名必立威立威必害物吾不忍也
庭中必陳刑具懸一革鞭亦不輕用其始至也戶僅
三萬稅萬餘石三歲後稅至十四萬石戶增六萬有
奇所部二州二十縣家有儲蓄野無餓殍牛羊鷄犬
散被郊坰桑麻榆柳彌亘田里諸祠廟壇壝公廨郵
舍河渠隄防之屬靡不繕修一如令甲八年入朝太
祖嘉其績賜宴禮部遣還郡諭之曰政成當顯用先
是曹縣知縣程貢以不職為克勤所笞銜之是年八
月訐克勤於朝詔遣御史按問御史貢故人欲實其

奏廉察兩月無所得乃捕吏卒酷掠之誣以私用倉
中炭葉時方十月固未嘗附火幣則苦公字實非私
用時帝用法嚴竟被逮民號呼若失父母至則下獄
子孝擄上書政府請代政府不為奏遂輸作江浦明
年空印事起又被逮至十月竟死於西市年五十有
一克勤篤於孝友方亂時徙就負母避山中血流至
數刻兩弟終身未嘗失色與人交洞見肺腑自奉簡
素一布袍十年不易行縣以食具自隨隣郡守因童
子進二木瓜答童子而還之鄉人為饒陽令以得雁
預薦却不受同列以事奪俸朝夕延與共食久而不

棄晚年益畏慎晝所行事夕必告於天俯仰皆無愧
作論者謂亮勤非獨循吏亦醇儒也子孝聞孝孺孝
聞十三喪母疏食終制孝孺自有傳

吳履字德基蘭谿人受業鄉先生聞人夢吉通經能
文善工書法李文忠公省浙東聘為學正已有司舉
於朝授南康縣丞周知民情偽有所摘發一縣驚伏
履乃更為寬大視民若子民有訴俾前與語或援丞
裾相爾汝弗責也有徵調召大姓坐廳下聽人人自
言德否由是民愛丞若父而黠吏不敢為奸縣令周
以中初視事召民轉輸不時至躬詣鄉耆之一人走

入山出語詬詈吏卒激怒令欲盡誣一鄉民圖賄已
捕七人置之獄嚴捕其餘人情大駭屢聞急脫七人
械俾還告父兄無恐乃往白以中以中益怒曰民衆
辱我而君釋之輕我耶屢曰犯使君者一人爾其鄉
人何罪且法乃天子法豈使君釋怒具耶倘急而生
變奈何以中語塞乃已為丞六年遷安化知縣初豪
民以世亂集衆為兵天下既定兵皆散獨豪長易氏
怙勇率所部入山自保江陰侯吳良至議發旁縣兵
進討屢曰易氏自述死未有反狀奈何激之使生變
乎若往招當必來不來用兵未晚也良聽之而事平

無何良議籍故兵之為農者民大恐屢召耆老諭之
曰侯所籍者兵民不與也取其願為兵者數人而止
府檄造戎衣履力爭曰安化民貧而俗暴恩之且恐
叛安可責之如他縣乎令格不奉命其罪小奉命而
致亂其禍大不敢辭小罪陷大禍也事乃已居三年
遷知澧州民畜官驢四十匹郡守嫌其孳息少欲責
償獲曰驢所產止此安從增且國家富極四海為吏
者宜培養民生去其疾苦寧少數匹驢耶守感其言
并他縣已徵者亦罷之山東民多以羊牛代秋稅屢
與民計曰牛羊有死瘠患不如輸粟便他日上官令

民送牛羊陝西驅走二千里多破產難以支粟獨完
已而郡牒役難千人部送鄰縣牛履曰民送已牛難
勞不怨今代他人脫道中牛死雖當償者郡無以難
也履為吏不求威名以愛利為本尤重獄事有訟召
而面直之釋其怒乃已不忍置之於獄獄屢空越二
二年會改難為縣召還難民遮道號泣乞其履歸事
之既至京遂謝病去

顧光遠蘇州嘉定人元末為鎮江掾太祖下鎮江從
入應天監大軍倉出納三載授江西行省理問從征
陳友諒督餽運有功擢龍陽知州招流亡祛蠹弊民

賴蘇息越二年改知泰和州龍陽老穉遮道號泣既至泰和知其民好訟難治乃為長榜勸諭諄切民爭來觀觀已去不訟者十之二其他來訟者俾思三日然後投牒未及三日去不訟者又十之六其真負冤者始為疏理悔而願止者聽之甫兩月民不復訟吏畏其精敏亦不敢舞文病民境有虎患時方禁軍器民無以禦訴於光遠光遠草檄告之神虎為遠遁久之部內大治與人頌之丁祖母艱入京留翰林編大明律書成復命監造天下均工圖籍始還鄉持服尋起為廣東行省郎中外交士馬內拊通逃賞罰明信

遠通翕然居二年召拜吳王府副相留京師坐誣誤
繫獄遽疾卒光遠性淡泊所居廨無長物食取充口
衣取蔽體而已初學詩於楊仲宏工七言近體有蔗
境吟稿教卷行世先光遠知泰和者為安慶吳去疾
有惠政州人語良牧者必以二人為舉首云

廖欽字敬先吉水人好學通經術洪武四年應召至
京試才學優等授河內縣丞以忠信導民未幾化其
俗縣當孔道民疲於供億欽嘗以己力助之稅務侵
課錢運坐者衆悉逃匿太行山欽曰民寃矣急之益
不可得盡緩諸示我以期不效併責我上官聽之乃

列侵課者姓名榜於市使人招之民素信欽皆還集
未及期課足罪皆獲釋而他郡械繫者至相屬於道
民益德欽曰徵我公我其獲免乎八年調吳江丞吳
江故有隄護田數千頃歲久而壞害於耕事聞命有
司修築期甚迫同官畏其難咸假他事避去欽怡然
任之即詣隄所計工費召父老諭之曰隄成利在民
不成禍在我爾其免諸於是民爭相赴工如期而竣
後去任值河內虧課錢三千有奇典守者以誣欽欽
不辨謫役鳳陽河內吳江民間之咸為助役獲釋歸
無何里中無賴子構欽兄弟咸就逮欽謂弟曰我兩

人倘不幸如老親何莫若我任事爾歸尚得事親不然俱斃無益也弟不可兄弟相讓於庭主者爲勤容由是弟獲宥謫欽遠戍數年以老病故還道經河內民見之曰是我昔日廖父也欽始曰我商人非爾丞乃聚少長爭識之羅拜於前欽不能隱競持酒殺爲壽明日又各齎饌遺之頃吏至數百欽辭不受民固請欽拒益力民懇請百方欽知不可卻一夕遷去同時以縣佐著聲者又有周舟高彬劉郁紀惟正杜渡舟永嘉人洪武時爲寶慶之新化丞明敏有治才廉勤奉公門無私謁覈民貧富爲三等徭役惟均故民

不擾而事易集訟獄文牒不假手吏胥故下不敢為
奸數年流亡盡獲境內晏然以績最擢吏部老功主
事既而民相率詣闕言自弁去職縣政復擾民不安
業乞令弁再任帝喜命禮部宴賞而遣之彬為歸安
丞以註誤連坐其部民赴闕言彬在職公廉未嘗以
事擾民民獲安業乞矜宥帝即還之郁為曹縣主簿
得民心亦坐累被徵耆民楊德等伏闕下稱其廉勤
愛民立命還任惟正為衙山主簿剛正有為紮廉自
守為同列所忌因事陷之逮至刑曹得白即擢陝西
右叅議渡官霑化典史為民所愛嘗坐事當徙霑化

人詰闕言獲廉幹得民心帝歎曰典史小吏耳而得民心如此良吏也其即還之

高斗南字拱極陝西徽州人貌魁梧語音若鍾洪武中由薦舉授四川定遠知縣才識精敏多善政為士民所懷形之歌頌二十九年與知府永州余彥誠知縣齊東鄭敏儀真康彥民岳池王佐安肅范志遠當塗孟康及丞懷寧蘇億休寧甘鏞當塗趙森並坐事先後被徵其耆民奔走闕下具列善政以聞太祖嘉之賜襲衣寶鈔遣還并賜耆民道里費諸人既還任政績益著尋舉天下廉吏數人斗南與焉列其名於

彰善榜聖政記以示勸九載績最擢雲南新興知州
亦有惠政新興人愛之不異定遠居數年以衰老乞
歸薦子禮科給事中恂自代成祖許之年七十而卒
恂字士信博學能詩文嫻騎射有文武才既官新興
從大軍征交趾有協贊功師旋卒於官彥誠德興人
初知安陸州以征稅愆期當就逮其父老伏闕稽首
言彥誠雖緩於催科實勤於撫字乞還之安陸終惠
小民太祖即賜宴加賞遣還職其父老亦預宴久之
以課最擢知永州府至是復以善政獲原郡有徭賊
據深山肆鈔掠彥誠為出榜撫諭賊詣府自歸民獲

安業終河東鹽運使敏初知齊東有政聲二十四年
坐事被逮其部民數十人稱敏廉勤有惠愛守闕下
求宥帝即宴勞復其官且賜鈔百錠衣三襲居數年
考滿入朝部民復走京師乞再任帝從其請宴賞而
遣之及是再獲宥政益有聞彥民泰和人洪武二十
七年進士先知青田調儀真後歷巴陵天台並有美
政永樂初罷歸至洪熙元年御史巡按至天台縣民
二百餘人言彥民廉公有為乞還之天台用慰民望
御史以聞宣宗歎曰彥民去天台二十餘年民猶思
之其有善政可知乃用為江寧縣丞億廉森三人既

釋還明年復當逮縣民又走奔闕下頌其廉勤帝亦
釋之當是時太祖方操重典繩羣下守令坐少故輒
逮繫聞其賢亦即遣還且加賞賚有因以超擢者二
十九年知縣靈璧周榮宜春沈昌昌樂于子仁丞新
化葉宗並坐事逮訊其部民咸叩閭頌其善政太祖
喜立擢四人為知府榮河南昌南安子仁登州宗黃
州由是長吏競勸一時多循良之績焉榮字國華蓬
萊人初為靈璧丞有惠政坐累逮下刑部其耆老群
赴輦下稱榮賢帝即賜鈔八十錠綺羅衣各一襲命禮
部宴榮及耆老而還之無何即擢榮靈璧知縣民益

樂其寬惠既知河南亦有聲民婦失物不知盜名訴
於榮榮密語之曰汝歸但罵府官不捕旁有嗔怒者
即以聞婦如其言果有嗔者一訊即伏郡中稱神後
建言稱旨擢河南左布政使

葉砥字履道上虞人好學有志行洪武三年舉進士
為定襄縣丞兵燹之餘民未安業砥勤於撫字流亡
來歸八年坐累謫徙涼州處之怡然曰吾無愧於心
足矣杜門為學士大夫遷謫者咸宗之大將宋晟知
知其賢延為子弟師建文元年群臣交薦且言其學
宜任史事乃召為翰林編修又有薦其堪任風憲者

改廣西按察僉事用法平恕獄無寃滯吏畏而民愛
之行部遷江有言峒獠入寇者衆洶洶奔逸訊砥少
避砥曰我去縣官必遁城誰與守下令料丁壯聯保
伍以待獠亦不至永樂初又坐誣被逮籍其家止故
書數篋事白還之仍命與史事書成改考功郎中爲
尚書蹇義所倚會修永樂大典命別總裁仁宗在
東宮又簡侍講幄九載秩滿錫四品服俸砥以年老
求去不許乃自言於尚書曰砥老矣願得一小郡自
效遂用爲饒州知府先教化後刑罰興利去弊摧奸
植良咸盡其力每水旱齋沐敦禱必獲有年謂饒風

俗厚民易治訟者必以理諭遣不付法曹久之政清
民安戶口滋息士之取科第者亦視昔增培以十九
年八月卒官年八十郡人聞之無少長皆毀畫哀所
著有南行芝山諸藁

史誠祖解州人洪武末詣闕陳鹽法利弊太祖納之
授汶上知縣以廉平寬簡為治民愛戴之永樂七年
太宗北巡遣御史考覈郡縣長吏賢否還言誠祖治
第一乃賜璽書勞之曰守令系流宣化所以安利元
元朕統御天下夙夜求賢共圖治理往往下詢民間
皆言若吏苛急能副朕心者實鮮爾敦厚老成恪共

乃職持身勵志一於廉公平賦均徭政清訟簡民心
悅戴境內清安方古良吏亦復何讓特擢爾濟寧知
州仍視汶上縣事其益共乃職俱終如始以永嘉譽
欽哉并賜內醢一尊織金紗衣一襲鈔千貫御史又
言貪吏虐民無若易州同知張騰遂徵下獄誠祖既
得旌益勤於治土田增闢戶口繁滋益編戶十四里
太宗過汶上欲徙其民數百家於膠州誠祖奏免之
屢當遷職輒為民奏留關二十九年竟卒於任士民
哀號留塋城南歲時奉祀其時縣令以久任得民者
又有吳祥李信祥蠡縣人永樂中知嵩縣為政寬和

流民自歸者二百餘戶境有猛虎劫賊為患祥虔禱
於神未踰歲獲虎二十餘賊亦散去宣德五年三考
績最當遷民群詣闕下丐留詔增二秩還任其後屢
考屢留闕三十二年而卒邑人莫不哀悼信臨汾人
永樂時由國子生授遵化知縣性慈廉撫民若子民
不敢欺宣德五年亦以秩滿當去天子從士民請增
秩留任其後屢當遷輒為士民奏留闕二十七年始
擢無為知州以年老不欲赴遂乞歸老稚泣送載道
房岳滑縣人宣德間為鄆縣知縣政平訟理事集民
安正統三年九載課最吏民乞留英宗從之亦增秩

贈金治縣二十餘年竟卒於任

彭豫字叔介泰和人受業鄉先生劉霖學行有聞洪武中兩被薦徵詣京師皆以疾辭建文時就聘為萬安訓導以上書言事擢香山縣丞地遠俗罵為政者多尚猛豫獨以寬久而民皆化服衛卒豪橫奪民良田豫毅然曰卒敢擅奪民產耶田不還吾必不貸卒知不可犯悉還之有大猾恒持官府短長衆皆搖手不敢詰豫悉寘諸法奸宄斂跡歲大旱諸人禱不應豫曰安有文具而可以格天者即齋戒致禱越二日澍雨沾足明年復旱豫再禱雨亦如之民居火延及

官廨豫向火叩頭風反火滅民不悅學雖設庠序數
十年生徒尚不知章句豫親為講授誘掖不倦數年
後遂有豫賓興登仕籍者在職六年以老疾致仕旋
卒豫事親孝執喪三年不御酒肉人未嘗見其啓齒
遇鄉里子弟必誨以禮義忠信故其施於一邑亦多
愷悌之政云

錢本忠武進人讀書通法律舉人才歷知故城元城
西縣有治聲改知吉水豪民宿吏素為民患者捕其
魁徙遠方邑中肅然新壇壝學舍集諸生躬為教督
旌別勸率政務清簡不任刑有盜聚山谷時出寇掠

郡守議加兵本中卑騎討賊壘曉以禍福咸相率縛
賊首自歸本中勵清操門無私謁妻子布衣蔬食裁
足朝夕以註誤罷官父老奔走號泣乞留不獲郡人
朗廣時在內閣力保之得還任民間本中復來空間
井迎拜如見父母以永樂九年二月卒民哀慕留塋
告水爭負土營塋焉

劉孟雍名熙以字行南昌人洪武末舉賢良授龍溪
知縣縣與潮州接境山谷深險有陳永定者負固為
寇時出剽掠累歲不能制孟雍至設策擒獲之一境
以寧先是為縣者率庸昏吏得肆其奸徭役失均民

多流徙孟雍覈其戶之虛實而差等之有所徵發民
不告病由是相率來歸乃勸農桑輕刑罰禁淫祀崇
禮教扶善抑奸邑以大治秩滿遷安州知州龍溪民
群赴闕下狀其善政乞留之乃命以知州秩遷治龍
溪永樂十八年卒民為肖像立祠同時朱瑤張準吳
春亦以治縣有聲瑤龍溪人為鄒縣知縣明敏有吏
才雖洞悉民隱而性寬厚有容茸學舍建宗聖書院
亞聖寢廟以興教化歲凶脫銀帶捐簪珥易粟賑饑
每循行郊原勸民耕植貸以牛種由是地無遺利家
有益藏其斷獄以情刑不妄施或用鞭中貫以綿老

釋莫不受戴以永樂十一年八月卒官縣人爲哭泣
罷市準崑山人舉賢良爲建安知縣持己端潔政務
愛民諸可以利民者必銳意行之歲饑乞以鈔代賦
大疫乞蠲徭徭朝旨皆報可自準泣任邑無失所之
民以永樂二十一年卒民懷思不忘春建安人由進
士任婺源知縣縣逋賦數年春委曲勸諭民皆樂輸
歲大蝗春引咎自責蝗皆赴水死興學養士輕徭省
刑頌聲四起永樂二十年卒於官士民皆巷哭
謝子襄名襄以字行新淦人建文中由薦舉授青田
知縣有惠政永樂七年與錢瑋知縣黃信中開化知

縣夏升並九載課最當遷其部民相率訴於上官乞再任上官以聞帝嘉之即擢子襄處州知府信中杭州升衢州俾得治其故縣子襄治處州聲績益著課農桑興學校篤意愛民郡有虎患歲且旱蝗子襄虔禱於神大雨二日蝗盡死虎亦遁去有盜竊官鈔子襄投檄城隍神盜方閱鈔密室忽疾風捲墮市中盜即伏罪民鬻牛於市將屠之牛逸至子襄前俛首若有訴問得實捐俸贖還其主有寇據山谷為亂朝廷發官軍二千討之一郡洶洶子襄力止軍城中毋出而自以計掩捕之果獲其魁餘解散子襄性廉謹歷

官三十年不以家累自隨稱一時良牧以二十二年五月卒信中餘干人先知樂清縣有奸人始其寡嫂至京誣告鄉人謀叛而已潛逸去有司繫其婦以聞詔行所司會鞠信中廉得其情力詆為誣獲全者甚衆有盜殺一家三人獄久不決信中齋沐禱於神遂得真盜遠近稱之其知杭州亦有異政升鹽城人既擢知府御史嚴待民信力役惟均民樂趙事為時良吏又有陳永年者子襄同邑人由戶科給事中出為惠安知縣亦以廉謹稱邑有蝗蝻傷稼一夕輒盡數十畝永年仰天嘆曰政失致災令罪也民則何辜俄

有群鳥啄食之蝗遂殄歲乃大稔改處州遂昌知縣
政亦有聞在官二年卒

劉綱字文紀禹州人第建文二年進士除陝西府谷
知縣政教善舉頌聲大作遷陝西寧州知州初爲府
谷頗尚威嚴及至寧以久敝之地因俗爲治稟民播
種之方隆學校均徭賦興屯練武廢墜具興以內艱
去代者已至民詣闕乞留詔乘傳還任綱益慎獄緩
罰民不忍犯州有龍尾湫時出光怪遠近以爲妖綱
伺其光動手射之應弦而滅洩其水巨壺也一日行
野中值橫石爲砒馬驚不敢度諦視之則范仲淹所

撰狄仁傑碑也即起豎之立祠祀焉後丁外艱考績者數皆以州人奏留仁宗朝特賜璽書褒異進四品俸服嘗至京師帝親召問勞以酒饌時人以為榮正統中以老乞休章數上始得請年七十矣居寧三十四年規模整肅如一日去之時哭聲震野寧舊有六君子祠祀狄仁傑以下嘗為刺史者至是生祠網其中改曰七君子祠網家居十餘年寧民間遺踵至其卒也多累糧致予者明興以來為州之久得民心之深無網如也子昂舉懷才抱德不赴孫宇官大學士贈網如其官

胡壽安字克仁歙縣人建文中舉於鄉入國學歷事
吏部授信陽知縣調獲鹿並有政績以內艱歸永樂
十一年服闋起補新繁首延父老詢邑中利病而罷
行之每歲春躬行原野勸民耕植遇田畝荒蕪或廬
舍圯壞者輒詢其窘乏所由為之資給常舉宋陳襄
教民格言勸導民間子弟多懼然從化歲久旱田時
盡裂齋戒禱神大雨霑足性淡泊布衣糲食如未仕
時寢處止一紙帳後園種蘆菰教畦使車往來採以
供客或老餽遺禮其子來省兩月烹二鷄壽安怒譙
責之其子後亦率化三宰大邑未嘗攜妻子或言公

之名美矣奈妻子何壽安菴曰吾輩讀古人書時不思建立名節及登仕版以玩好聲色敗者衆矣矧婦人女子其性猶水一以金珠錦繡蕩其心彼將欺我而竊取故不欲其為身累也聞者以為格言十五年考績赴京民遮道泣送者千數事竣遂告歸同時石啟宗江西樂平人以薦舉為歙縣知縣守官廉謹人莫敢干以私而臨民平易不尚威嚴尤善決滯獄人稱神明歲旱禱之即雨及蝗生祈於城隍神蝗盡殄歲屢有秋小大樂業以永樂六年卒官人咸哀慕又有許譽者長山人洪武時為儀封知縣居官廉能政

尚平起部民愛之惡邑人好游惰嚴為禁戒自是墾
田日增盜賊弭息永樂元年三考績最當遷去其民
相率叩閭乞留太宗嘉歎即賜襲衣寶鈔遣還又三
年遷武昌知府

葉宗行松江華亭人讀書尚氣節永樂中東吳大水
松江尤甚以黃浦下流壅塞水無所歸宗行上書請
棄故道濬范家港引浦水入海禁民無私作壩以遏
其流帝善其言命往從尚書夏原吉相治事竣原吉
薦其才擢錢塘知縣民用徭重宗行定法俾民自占
甲乙書於冊循次役之遂均詞訟稀間不尚威嚴未

適年翕然稱治一日庭前有蛇蜿蜒若有所訴宗行
曰若豈有冤乎吾當驗之蛇徐入餅肆爐下發之得
屍乃肆主利其財而為之者遂伏辜嘗行江中忽舟
重不能進視之有屍掛於柁蓋里中人殺而沉之者
亦捕其人抵法仁宗在東宮聞其名戒所司不得輕
侮按察使周新風采嚴峻獨重宗行嘗候其出潛至
邸舍視之惟銀魚腊一裹他無所有新歎息攜少許
去明日召宗行共食曰此君家物也飲之至醉用己
儀仗導之歸時呼為錢塘一葉清十五年營建北京
宗行督工匠往役卒於途新聞之悲悼累日為文以

祭錢塘吏民無不歎息泣下者

周原字彥廣繁昌人洪武十八年進士授辰州推官
調吉安時知府及同知通判皆缺人原以一身兼數
職才識明敏而泣以公平庶務畢舉獄訟疏決無滯
民負寃積歲不白者至原而悉白不旬日囹圄為空
後坐累免用薦起為蒲臺知縣有商被盜疑其主人
已誣服原覺有寃緩其獄而察之果得真盜入服其
明飛蝗入境原禱於神一日大風雨蝗盡死歲以大
稔士民莫不愛之改浙江新昌知縣治如故操亦為
下所愛秩滿遷磁州同知永樂二十卒於官民咸哀

慕原通籍垂四十年其官彌遷彌下而志不少變所在
見稱士論尤多之同時以下僚著績者州判官則有
易州張友聞壽州許敏許州王通縣丞則有靈璧田
誠安平耿福祿嘉定戴肅大名賀禎主簿則有昌邑
劉整襄垣喬育典史則有貴池黃金蘭深澤高文諸
人友聞以兄員當汰部民言其律已廉處事公勤於
撫字乞改督本邑馬政仁宗納之敏佐壽州善持已
愛民民奏乞擢用即用為本州同知通九載課最當
遷民狀其善政乞留進秩還任誠丞靈璧滿九載父
老恐其遷去乞闕言誠居職廉能撫民有道乞還之

百姓詔以州判官秩仍准丞事福緣兩以冗員當汰
皆為部民所留最後又當汰民相率言福緣佐安平
守法奉公視民若子賦役均盜賊息田里獲安今當
去職民失所倚且見在縣令有疾求去乞即用福緣以
活百姓宣宗嘉嘆即擢為安平知縣肅丞嘉定惓惓
愛民後以冗員調山東平陰嘉定民一千三百餘人
共乞還任帝即從之碩在大名勵廉隅善撫卹吏民
戴之洪熙元年冬以三考稱職當遷秩民伏闕乞留
詔即擢大名知縣整在昌邑以舊官還任當去部民
言整有善政能恤民瘼載吏奸請留之昌邑帝可之

育以九年考滿詣京其耆老言育持己廉謹撫下仁
慈乞還襄垣終惠百姓詔進二秩遷任金蘭既九載
課最貴池父老赴闕下言其賦政寬惠有愛民心請
留任仁宗曰能致民數千里奏留是不負朝廷任使
矣即用為貴池知縣文官深澤能持己惠民民奏乞
擢用宣宗嘉悅立擢深澤知縣

貝秉彞名恒以字行上虞人永樂二年第進士授邵
陽知縣地僻民頑前令治尚嚴秉彞獨用寬和民咸
愛戴歲餘以祖喪去復丁母憂服闋改知東阿地當
衝要素苦使客往來秉彞規措有方民以不擾有兄

弟相訟曉以大義使退思兄弟皆悔謝歲旱禱雨立
應蝗生引咎責躬蝗還散獻議於朝請行平糶法為
脩荒計帝嘉之下其議為他郡縣式壇廟費舍罔不
修舉鄉社亦皆立學時循行田野觀民耕獲驗其勤
惰而勸懲之縣西南有巨浸每春夏霖潦輒泛溢為田
害秉彜欲開渠納諸大清河僚佐持不可曰法不得
擅役民秉彜曰吾以利之也有罪請獨任之及渠成
得沃壤數千畝流亡來歸者甚衆帝北巡命山東民
供饋餉他邑令皆憚行秉彜獨毅然就道與民共勞
苦迄師旋無一民失所性喜綜畫凡廢鐵敗皮朽索

故紙悉收之工匠暇輒令煮皮為膠鑄鐵為杵搗紙
索為穰貯之庫車駕屢北巡勅使督建蓆殿悉以所
貯濟用民力為舒有薦其廉公堪任風憲者徵命已
下耆老百餘人詣闕乞留乃還任二十一年三考績
最當遷耆老復詣闕乞留詔進二秩仍治東阿民間
秉義復來惟迎數十里嘗坐累罰役京師時有令役
滿即獲官民競代其役凡三罰三代之其得民心如
此以宣德元年十一月卒官僚屬胥史及邑中縉紳
士民咸哭之慟議留葬東阿其子固辭乃已其後有
葉騏者亦為東阿知縣有賢聲正統三年以九載考

最入都縣民群列其善政乞留下所司核言皆有徵
乃可其奏

王源字啟澤龍岩人永樂二年擢第授廣吉士改深
澤知縣修學舍築長堤勸民及時嫁娶革其爭財之
俗教上書論事被詔徵入都又論時政得失忤旨下
吏會赦獲復官益盡心民事奏免逋負歲饑輒發粟
賑救坐是被逮民爭先輸納得贖還時有蝗不入境
兩不出疆之謠秩滿召為春坊司直即侍諸王講讀
一日進講王他顧源正色規之王為改容遷衛府紀
善授松江府同知奏蠲積逋數十萬石鋤豪民釋寃

獄政聲甚著以母老乞終養歸服闋除刑部郎中宣
德十年五月英宗踐阼倣先朝制擇廷臣十一人為
知府賜勅及宴乘傳行源得潮州府廉明愷悌大得
人和乃新黉序立社學黜貪殘獎廉惠政教善舉城
東有廣濟橋修二十餘丈歲久圯壞源歛民萬金重
築之以其餘建亭設先聖四配十哲像刻藍田呂氏
鄉約擇民為約正的副約士講肄其中而時偕僚案
董率馬西湖山上有大石為怪源命鑿之下果獲石
骷髏怪遂息乃琢為碑大書潮州知府王源除怪石
河東山有韓愈祠源建亭祠左朔望輒懸已像又自

建書院刻詩文於內會杖一民致斃民之子訴諸朝
并以築橋建亭諸事為源罪章下巡按御史不為辨
遂逮繫至京罪當贖徒潮人相率叩闕乞還任乃復
其官士民聞其再至鼓舞遠近歲滿考績詔進二秩
尋以年七十乞休潮人奏留不獲立祠祀之所著有
書傳補遺異端辨僞菴集陳獻章有言吏於潮者多
矣其有功而民思之前惟韓愈後則王源同時有王
昇者源同年進士亦由庶吉士出為安福知縣扶善
疾惡以民瘼為己憂甫七月境內順治以舊官至改
知羅田民泣送載道泣羅田三載百務具興士民頌

其廉遷歷大理評事左寺正獄平允宣德五年冬
詔簡廷臣為知府少傅楊士奇薦昇乃賜勅出知撫
州至官政尚寬簡民情大和九載秩滿部民三千餘
人乞留詔增二秩還任尋以疾歸昇生平澹然無欲
惟養一鶴自隨暇則鳴琴歌咏人擬之趙清獻云
翟溥福字本德東莞人永樂二年進士除青陽知縣
有惠愛縣近九華山虎恒為患溥福齋戒移檄山神
虎即殄久之移新淦亦有善政入為刑部主事進員
外郎為尚書魏源所器正統元年七月詔舉廷臣堪
任郡守者源以溥福應乃擢南康知府溥皆利獎者

去疾苦省刑罰禁橫征民情胥悅先是歲歉民有擅
發富室倉粟及收取漂流官木者前守悉坐以盜當
死者百餘人溥福聞竇悉杖而遣之地濱鄱陽湖舟
遇風濤苦無所泊為築石隄百餘丈往來者便之嘗
游廬山北白鹿洞書院兵燹後廢為瓦礫慨然歎息
即倡衆興復且延師訓其子弟期望躬詣講授自是
文教日興考績赴部以年老乞歸侍郎趙新先廵撫
江西稔其治行大聲曰翟君此邦第一賢守也胡可
聽其去懇請累日乃許之辭郡之日父老爭携金帛為贖悉
却不受衆挽舟涕泣不忍舍因建祠湖堤上祀之又

配享白鹿書院之三賢祠三賢者唐李渤宋周敦頤
朱熹也溥福生平剛方廉謹入仕三十餘年始終一
節稱一時良吏焉

孫賈永樂間為鞏昌知府廉介仁恕均徭省刑民懷
其惠而吏不敢為奸遭喪去官耆民詣闕乞留詔奪
情還任賈矢志彌厲公勤不懈洪熙時九載績滿所
部三州十四縣之人恐其遷去相率訴於上官乞再
任乃至衛所武將下及軍士亦群狀其善政乞奏聞
上官雅知其治行拜疏懇請時宣宗初踐阼覽之嘉
歎即可其奏居三年又當考績部民復走數千里守

闕下乞留帝益嘉之命進二秩如其請還歸善政益著同時稱良二千石者又有吳致文徐孔奇致文浙江平陽人永樂四年進士除刑部主事有能聲出為九江知府改建昌奉職公勤一志愛民請託無所容奸弊悉絕念官田賦重奏乞折徵布帛闔郡稱便以宣德五年二月卒官吏民哀悼若喪所親孔奇豐城人永樂十二年進士授刑部主事調北京行部又改行在刑部以清慎著聲出為嚴州知府布衣蔬食下無所擾其視民若子弟惟恐傷之待僚屬若朋友不能者教之未嘗輒加之罪興除利弊夙夜惟勤列城莫

不愛戴宣德八年入覲卒於京師民為巷哭罷市

李信圭字君信泰和人洪熙時舉賢良授清河知縣
勤於拊循招徠流移課其耕墾縣瘠而衙官艘日相
衝役夫動以千計前令請得沐陽五百人為助然去家
遠艱於衣食信圭請免其助役代輸清河浮征三之
二兩邑便之俗好發塚縱火逞其私忿信圭設教戒
十三條令里民書於牌月朔望儆戒之且令書其民
勤惰善惡以聞俗為之變歲旱蝗禱於城隍神蝗不
入境宣德三年奏言本邑地廣人稀路當衝要日發
民挽舟丁壯既盡役及老穉致妨廢農桑前年兵部

有令公事亟者舟予五人緩者則否今此令不行役夫無限有一舟至四五十人者兇威所加誰敢詰問或遇快風步追不及則沒其所費衣糧俾受寒餒乞申明前令哀此憚人從之八年春又言自江淮達京師沿河郡縣悉令軍民挽舟若無衛軍則民夫盡出晝夜以俟而上司又不分別襍泛差徭一體派及致土田荒蕪民無蓄積稍遇歉歲輒老穉相携緣道乞食實可憫傷請自儀真抵通州盡免其襍徭俾得盡力農畝兼供夫役帝亦從之自是他郡亦蒙其澤正統元年三考俱稱職用侍郎章啟薦擢知蘄州清河

民詣闕乞留命以知州理縣事民有湖田數百頃為
淮安衛卒所奪民代輸租者六十年信圭奏之詔還
之民民有因饑攘食人一牛者御史論死八人信圭
曰以八人償一牛可矜也言之朝得免者六人明年
四月久雨傷麥五月淮水大溢沒廬舍畜產甚衆信
圭奏請賑貸并停歲辦物料及軍匠厨役濟河人夫
朝旨亦報可南北往來道死不葬者相枕藉信圭為
三大塚日遣人拾瘞之民有事不遺卒追呼但與為
期皆自赴有爭訟諭之以理令退省多感悟而罷善
政流聞民戴之若父母惟恐其去十一年冬以尚書

金漢薦擢處州知府其在清河已二十二年矣使者持
符至俾即上道民無少長皆流涕追送處州方苦旱信
圭至輒雨民大悅未幾卒於官清河民聞之咸哭盡哀
為立祠奉祀

徐士宗浙江山陰人永樂間為貴溪知縣適縣圯於水
士宗夙夜經畫重建縣治學宮及諸公廨下無所擾民因
積逋奏請徵布以舒之田疇衝沒者奏蠲其稅歲旱蠲
以補餼則設策賑救數年田野盡闢戶口日增治行冠
於列郡宣德六年三考俱最民惟恐其遷去郡走京師丐
留帝嘉之命增二秩還任明興至宣德正統間民淳俗

富吏易於為治而其時為吏者又多勵長者之行以循良凡稱其以秩滿奏留者多不可勝紀今畧舉數人列於篇孫浩永樂中為邵陽知縣遭喪去官洪熙時陝西按察司言浩前為邵陽撫字不急庶公有為吏畏其威民懷其惠今所屬咸寧閩知縣必得如浩者方能稱職乞聖恩調任宣宗嘉歎即命起復赴咸寧浩果以稱職開起擢辰州知府薛慎知長清大得民心以親喪去洪熙元年九月長清民知慎服闋相率詣京師乞再任吏部尚書蹇義以聞且言長清別除知縣已久即如民言又當更易帝曰必其不如慎故民復求舊國家置守令但

欲其得民心苟民心不得雖屢易何害遂還之吳原
知吳橋有異政洪熙中以九載考績赴部縣民八十
餘人詣闕言原勤於撫字賦役平均民生樂業乞留
任帝即從之陳哲為博野縣民大愛之以舊官還職
解去宣德元年部民悲訴於巡按御史言舊官才德
不逮哲遠甚惟哲有父母斯民之心乞還之博野毋令
小民失所御史以聞帝亦報可暢宣知秦安以母憂
去民群訴於副使鄭瑩言宣為政廉能撫民慈惠科
徭平流徙復訟獄清簡盜賊屏息獨剔除他官民將
失所瑩以聞仁宗命服闋還任宣德改元宣服闋吏

部以請帝曰民欲之監司言之固當從况有先帝之命乎其即還之劉伯吉為碭山有惠愛亦以親喪去及服除碭山民守闕下求再任吏部言新令在碭山已二年矣帝曰新者守舊則民不獲思今久而猶思其賢於新者可知矣遂易之孔公朝永樂時知寧陽清廉直幹惠綏小民民深戴之坐與同僚飲酒忿爭並遣戍部民屢叩閭乞還皆不許宣德二年詔求賢有以公朝薦者寧陽人聞之又相率叩閭乞再得公朝終惠百姓帝顧吏部蹇義曰公朝去寧陽已二十餘載民數數奏乞不已此非良吏耶可即與之郭完

知會寧潔廉正直一志愛民嘗責一奸人反為其人
所訐遂被逮里老三十餘人走數千里伏闕下訟寃
乞還完帝亦報許其他若內丘馬旭桐廬楊信北流
李禧洋縣王輔保安張庸獲鹿吳韞扶風宋端皆以
九載奏最為民乞留即加秩久任以故吏稱其職民
安其業循良之風於斯稱盛焉

張宗璉字重器吉水人永樂二年進士改庶吉士預
修永樂大典授刑部主事奉命錄囚廣東多所平反
仁宗初簡廷臣為東宮官擢左中允宣宗嗣位進大
理寺丞尋清軍福建勅諭毋枉民縱奸宗璉一奉勅

書行事民以不擾常有詔求賢郎中况鍾以宗璉應
帝曰人皆舉下僚鍾獨舉吾近臣何也會常州府缺
同知遂以命之宗璉性淡泊居官不携家一室蕭然
既蒞任職專督農行視河渠教以蓄洩法親履陂畝
察其勤惰而勸戒之時坐阡陌與農夫相爾汝如家
人未嘗加以笞辱遇老疾鰥寡尤垂意焉所至飭學
校正士習導以禮義士民翕然歸心及御史李立來
清軍請於兵部曰常州必得張同知共事乃可部遂
以委之立璉驚新刻意務得軍凡軍戶絕者必取同
姓或姻婭及承佃產業之人酷刑使承役怨聲載途

宗璉數與爭立怒盛氣詬詈宗璉不為屈爭之愈力
坐是憤鬱疽發於背以宣德四年十月卒官列城聞
之奔走弔哭祭奠者彌月不絕暨喪歸素衣冠送者
數千人江陰民為祠祀焉

衛岳字世瞻汝寧西平人洪武中舉於鄉肄業國學
三十年詔選諸生通治術者赴詹事府議事衆咸推
岳岳往數陳時政切直不迂所司以聞遂擢潮州府
同知約已惠民布衣蔬食常祿外一無所取嶺海間
翕然稱廉建文四年遷西安知府有惠政以內艱去
服闋改知慶陽治如故操同僚諸婦常會飲岳妻與

馮諸婦冠服華美金珠爛然岳妻荆釵布裙而已既
罷意色慚阻岳笑謂曰汝何坐曰首席曰既居首席
又求服飾華好富貴可兼得耶永樂十年朝覲至京
以言事件旨謫戍交趾慶陽西安民間之爭入都呼
閭乞賞岳以終其惠凡千餘人奏入不報仁宗初下
詔求賢御史表銳鹽運使何士英指揮范智交章論
薦起江西南城知縣以舊官選任改南豐祿薄不足
贍常於官舍種蔬以自給家人或有愠色輒曰不猶
愈充軍時耶正統四年以侍郎何文淵薦擢桂林知
府在職五年廉慎愷悌終始若一以老致仕歸貧無

以為養士論莫不高之